

關愛的故事



殘障人士亦可獨立生活

我叫小明，係痲痺人士，需要用步行架嚟行路。因為隻手會震，阿媽驚我洗碗打爛碗，好多嘢都唔敢俾我做；佢又好少帶我出街，驚我俾人歧視。成日搵喺屋企真係好悶，好唔開心。

我喺特殊小學接受過教育之後，就喺庇護工場工作，喺 2003 年有機會入住半獨立式嘅小型宿舍。宿舍係為具有自我照顧能力嘅傷殘人士而設，裡面有好多設施，包括家政室、沐浴台、模擬商店、模擬自助居屋，仲有各種治療同輔助器具，幫助舍友克服傷殘嘅障礙，邁向一個更加獨立嘅生活，從而融入社區。

初頭入住宿舍嘅時候我都好擔心，驚住啲嘢做唔嚟，但係宿舍主任同職員都安慰我，叫我唔使驚，慢慢來，佢哋會教我，最緊要係我肯俾心機去學。經過幾年嘅訓練，我喺自我照顧能力方面有顯著進步。為咗提升舍友嘅自信心，宿舍會開辦唔同類型嘅才藝小組，好似輪椅舞班、話劇小組、敲擊樂班、電子琴班、魔術班…等等。而家，我已經學識洗衫、煮飯、買嘢、搭車、申請證件……，除咗每日幫手預備膳食，我仲投入社區，參與團體活動，同埋做義工服務。

宿舍仲幫我申請到電動輪椅，我可以約埋宿舍嘅朋友、以前讀書嘅同學周圍去，我真係好開心！我希望可以去醫院探望一啲同我一樣有需要嘅人，話俾佢哋知，佢哋都可以好似我一樣，過一個充實而又有意義嘅人生。

(512 字)